

Datozenei jarriak

I

Patera zaharrari
tira eta tira
kostata heltzen dira
batzuk urrutira.
Hegazkinez egiten
dute besteek bira.
ETORkinak etortzen
direnak badira
zergaitik gaude beti
pobreenei begira?



INIGO AZKONA

IV

Euskara ikasiko
balute gustura...
Baina eurenik ez dugu
hemen hartu gura:
“Euren erruz ai ene!
Hizkuntza galdu da!”
Ez bota pelotarik
besteen teilatura,
geurea baita geure
akatsen ardura.

II

Etorkina ez da hitz
ona beharbada:
Mundua hala denetik
—zintzoak bagara—
gizakia izan da
askotan nomada:
lanera, ezkontzera
zein oporretara
beti ibili gara
hona eta hara.

V

Kultura berritzaile,
hizkuntza sorburu.
Herentzia adinaren
zama daramagu.
Konpartitzea hartu
dezagun helburu
guretzako bakarrik
gordetzen badugu
gurekin ehortziko
baitugu seguru.

III

Nahiz eta korrektoak
garela erakutsi,
politikoki zuzen
gabiltza itsusi.
Etorkinenganako
sarri dut ikusi
errespetu gehiegi
ta ulermen gutxi:
“Amen: zu hor ni hemen,
ta bakean utzi!”.

VI

Lehen gertatuengatik
zergatik kezkatu?
Ez eskatzeak sarri
izorratu gaitu.
Baina geuk ematea
ez dezagun ahaztu.
Zergatik ez pertsonak,
kulturak nahastu
baietz beraiek beste
gu geu aberastu.

DOINUA: Espainian behera.